

mens de Dieu ; Il est Seigneur des Cieux & de la Terre, personne n'osera parler lors que les esprits & les Anges seront assemblez deuant luy , personne ne pourra parler ny prier pour autruy sans sa permission ; Ce iour sera le iour de la verité , Ceux qui luy seront agreables se retireront auprès sa Diuine Maiefté. Nous vous auons presché que la punition de Dieu vous arriueroit bien tost , chacun verra tout ce qu'il aura fait , & les meschans diront au iour du Iugement, plût à Dieu que ie fusse terre & poussiere.

*LE CHAPITRE DE CEUX QUI
arrachent, contenant quarante-six versets,
escriit à la Meque.*

AV nom de Dieu clement & misericordieux. *Gelal dim-
intitule ce
Chapitre
de ceux
qui tirent
un ame.*
Le iure par les Anges qui arrachent l'ame des
corps des infidelles & des meschans, Par les Anges qui
accompagnent les ames des fidentes; par les Anges qui
exaltent la gloire de Dieu ; par les Anges qui condui-
sent les ames des gens de bien lors qu'elles vont en
Paradis, & par les Anges qui sont commis aux affaires
du monde, que tout le peuple ressuscitera au iour du
Iugement , ce iour la terre tremblera , & les cœurs
des hommes fremiront au premier coup que la
trompette sonnera : Au second coup leur veuë se
troublera de peur, & dirôt; Nous voicy, nous sommes

retournez sur la terre au lieu d'où nous estions sortis, nos os estoient pourris, & nostre retour au monde ne nous causera que du malheur, ce second coup que la trompette a sonné est signe de l'ire de Dieu; Alors ils seront hors des monumens ressuscités sur la terre. Astu appris l'histoire de Moïse, & comme Dieu son Seigneur l'appella dans la vallée Sainte appelée Toï, & comme il luy a dit, va vers Pharaon, il est deuoyé du droit chemin, il est dans vne grande erreur; Dis luy, Je t'appelle à la voye de salut, ie te purifieray & te conduiray au chemin de la loy de Dieu, afin que tu aye sa crainte deuant les yeux. Moïse fit voir à Pharaon vn de ses grands miracles, neantmoins il a mesprisé Moïse, il luy a desobey, & s'est esloigné du droit chemin, il a fait assembler son peuple, & a fait publier qu'il estoit leur Dieu, mais Dieu l'a rigoureusement châtié à cause de ses blasphemes, c'est vn exemple de sa toute-Puissance à ceux qui sont gens de bien. O impies, auez-vous esté plus difficiles à créer que le Ciel? Dieu a esleué sa voûte, & la proportionnée; Il a rendu la nuit obscure, & le iour plein de clarté, il a estendu la terre, il en a fait sortir les fontaines pour arroser les plantes & pour abreuuer les animaux, il a esleué & affermy les montagnes pour vous & pour vos troupeaux. Les hommes se souuiendront du bien & du mal qu'ils auront fait à la seconde fois que la trompette sonnera, & l'Enfer paroistra ouuert deuant leurs yeux; Les impies qui auront suiuy leurs appetits en terre, seront précipitez dedans l'Enfer, &

ceux qui auront eu la crainte de Dieu deuant les yeux, & qui auront dominé leurs passions en ce monde iront en Paradis. Les impieste demanderont quand sera le iour du Iugement, personne ne le sçait que ton Seigneur: Tu n'es enuoyé que pour prescher les peines de l'Enfer à ceux qui craignent ce iour comme s'ils le voyoient present deuant leurs yeux, ils croiront n'auoir demeuré dans le tombeau que du soir au matin lors qu'il ressusciteront.

*LE CHAPITRE DE L'AVEUGLE,
contenant quarante-deux versets,
escrit à la Meque.*

AV Nom de Dieu clement & misericordieux. Le Prophete a fronsé le front, a eu le visage reffronné, & s'est retiré lors quel'Aueugle est venu vers luy. Il ne te dira pass'il croira en Dieu, & s'il profitera de tes predications; esloigne-toy de celuy qui s'esloignera de la loy de Dieu, tu n'es obligé qu'à le prescher, & non pas à le faire croire, mais ne quitte pas ceux qui te viendront voir pour estre instruits & qui craindront Dieu. L'Alcoran est enuoyé pour instruire le peuple, il a esté copié sur le liure qui est gardé au Ciel, auquel honneur & loüange sont deus eternellement. Pourquoi l'homme est-il impie? est-ce, parce qu'il est créé d'un peu d'eau arrestée dans le